

Die Housn

Ganz früher hat mer in der Stadt
viel öfters "Originale" ghat,
vo zwä davou söll mei Gedicht
aus dera Zeitr jetz bericht:

Im altn Speicher, wus een graust,
ham untern Dach zwü Brüader ghaust,
oft nit gewaschn, nit gekemmt,
im Zimmer war nex aufgeremmt,
a Fraa hat da wahrhafti gfaht,
a Mannerwertschaft war des halt!
Kommunen hats damals nit gam,
sou ähnli aber war ihr Lam.

Bei fremda Leut, mehr schlacht als racht,
ham sie es Brennholz kleegemacht,
un dafür ham die arma Wicht
gewöhnli dann a Brotzeit kricht;
manchmal ham sie aa für die Kost
die kleena Gärtli ausgegrost.
Die Bürgerhäuser warn ihr Kundn,
berufli warn sie nit gebundn.
Zur Arbet sen die nit gerennt,
den Streß ham die nu nit gekennt,
un sou warn die aa Gott sei Dank
im ganzn Lam nie mänädschkrank.

Des Schönsta war - du kannsts nit rat -
ee Housn ham die zwü blos ghat;
der Losentscheid hat klar bestimmt,
wer jeweils dann die Housn nimmt.
Für den Verlierer wars nit schlimm,
der is im Bett halt lieggebliem.
Doch die Gerüchte stimma nit,
der ee hätt gor sei Housn mit
der Beißzang immer ougezouchn -
wer des behaupt, hat glatt gelouchn!

Am Sunntooch war der eena Hou
natürli mit der Frühmeß drou,
kummt der dann hem, geht immer glei
der anner in die Spätmeß nei.

Aufs Tanzn, wenn die Musik spielt,
warn die zwü Kerl besonders wild,
natürli war dann allamal
blos eener da im Tanzlokal,
denn ohne Housn derfst nit nei,
des wär a schöne Schweinerei!
Un als Ersatz a Lendaschurz,
wie bei der Neger, wär zu kurz!

./.. Fortsetzung von "Die Housn"

Bei Halbzeit geht der eena Mou,
denn jetzt kummt nu der anner drou.
Souball der ersta hemwärts flitzt,
ham alla Leut im Saal scho gspitzt,
es dauert nit lang, dann kummt glei
der anner mit der Housn rei,
un dann tanzt der auf den Parkett,
sei Bruader liegt dahem im Bett.
Was will denn der in dera Lag
aa ohne Housn anners mach?
VerstöÙe gegen guata Sittn,
die warn grundsätzli nit gelittn;
bei "unten ohne" kummet glei
die "Freund un Helfer"-Polizei.

Mei Vadder hat - i soochs zum End,
die zwü persönli nu gekennt!